

24 NOVEMBER 2017

Budi bicara putus hukuman dadah

Kuala Lumpur

Budi bicara putus hukuman dadah

Rang Undang-Undang Dadah Berbahaya (Pindaan) 2017 dibentangkan pada sidang Dewan Rakyat, semalam.

Pindaan itu termasuk cadangan memansuhkan hukuman mati mandatori mengikut Seksyen 39B, Akta 234 supaya mahkamah diberi ruang bagi menggunakan budi bicaranya dalam menentukan hukuman bagi pesalah kes dadah.

Bacaan kali pertama rang undang-undang itu dilakukan Menteri di Jabatan Perdana Menteri Datuk Seri Azalina Othman Said di hadapan Yang Dipertua Dewan Rakyat Tan Sri Pandikar Amin Mulia.

Azalina berkata, pindaan dicadangkan itu selari dengan *principal of sentencing* yang mana mahkamah diberi ruang budi bicara untuk menjatuhkan hukuman

selain hukuman mati mandatori.

“Bagaimanapun, kuasa budi bicara mahkamah hanya tertakluk untuk menjatuhkan hukuman penjara seumur hidup dan tidak kurang 15 sebatan selepas mahkamah mengambil kira keadaan tertentu.

“Hukuman mati mandatori masih perlu dikekalkan bagi memberi gambaran jelas bahawa kerajaan tidak berkompromi dengan mereka yang mengedar dadah yang menjadi ancaman kepada rakyat dan negara,” katanya dalam kenyataannya di sini.

Menurutnya, semua pihak perlu melihat pindaan itu sebagai langkah proaktif kerajaan bagi memastikan keadilan sewajarnya kepada mereka yang tidak sepatutnya dijatuhi hukuman mati mandatori.